

南陽府志序

郡志修於康熙甲戌爲前守上虞朱君所輯迄今一百十四年戶口日增沿革異制竟無踵而修之者今春奉命來守茲郡檢閱舊志亟思有以補之旣以公事繁冗亦未暇及幸歲慶

有秋民氣和樂獄訟稍息遂與僚友
共相採訪手自刪訂付之瑯人藉以
備考稽而廣聞見而於體裁一仍其
舊蓋亦先民是程之意也夫

嘉慶十二年歲次丁卯十月旣望知
南陽府事元和孔傳金謹識

原序

中原蓋自古稱文獻淵藪云若汴
京東都鄴下汲郡皆居天下形勝
嘗建都會矣後渠西亭諸先輩嘗
採摭萃摛彬彬然有成書繼其後
者倣而續之蓋無甚難也若宛南

據荆襄上游控制關陝譚形勢者
尤稱兩河門戶自東漢世祖肇造
於茲一時攀龍附鳳之彥半產於
桑梓下及志節之士翰墨之流乘
時間出亦所在多有而名公巨卿
握符綰綬嘗有事於其地者如召

杜劉牟諸君子又良法善政於史
冊代不絕書其稱中原文獻固無
讓汴京東都鄴下汲郡諸名區也
然自昔郡乘歲月相沿未擅職方
之美而又遭流氛之餘芸編漆簡
都付劫灰芳跡懿行概銷塵土於

此時而欲廣收散佚另創體例成一郡完書以追踪於崔朱兩君其可易言乎庚午之冬予自鄂佐量移宛守荷上憲檄修郡志卽轉檄各屬同時開局旋以西運仔肩車轍馬跡終歲勤動不遑寢息復奉

中丞顧公德意務期覈實速決不以寡陋凜焉是懼爰於簿書之餘詳搜近事準之輿論親自撰錄不敢一字假手於人至於見諸前代者尤不敢依樣葫蘆以抄襲塞責遣倅走越悉輦先世藏書羅列郡

署叅互考証用心頗苦歷十數月

而稿具竊惟志者史之流也蓋將

昭示來茲非僅爲方輿飾美觀旣

爲一郡而作則凡一郡之利害所

宜悉心講究一郡之因革所宜悉

悉斟酌一郡之前言往行存於故

牒傳於遺老者所宜悉心考稽而
佩服焉者也若不洞其源委徹其
終始亦何以示後之從政者如著
龜在前俾知所嚮往乎昔康對山
作武功志邵二泉作許州志徐文
長作山陰志雖繁簡不同詳略各

異要皆於斯數者嘗三致意焉世
代雖殊典型在望予於宛志之修
又何敢忽而不詳也後渠彰德志
例倣龍門諸書體裁簡嚴寄意深
遠識者稱之西亭開封志不傳而
中州人物志盛行於世或謂開封

舊志嘗草創於西亭特未專其名
耳固依然西亭之筆也今予修南
陽府志於崔朱兩先輩之書何敢
望其項背然於繙閱校訂之下深
以鹵莽蹈襲爲戒而間有鄙言綴
於紙尾亦於

國計民生風俗人心竊嘗再三致其
丁寧蓋亦以仰體夫憲意而聊爲
中原存文獻於什一云爾

康熙歲次甲戌長至後一日知南
陽府事加一級古虞朱璘撰

凡例

一輯是志定爲六卷一輿地二建置三賦役四官師
五人物六藝文以六爲綱分門析類爲目斯綱舉
而目從也

一輿地志地領於郡而所轄州縣隣封接壤山川繡
錯非載入志書無以正疆界而定章程故首重焉
占星野考祥異則由地理而天文著矣至歷代以
來沿革不常風俗互異古蹟有顯晦物產有消長
必博稽而詳覈之援昔證今瞭如指掌以備職方

之考

一建置志城池以衛民官署以蒞民興學崇祀以教民而置郵傳命又承流宣化所亟亟也其次設關梁以通往來立集鎮以居百貨修築陂堰以溉農田何莫非民事何莫非郡邑長吏之事一一備載俾得稽其舊制因時變通實心釐飭庶前人之良法美意不致廢隳矣

一賦役志所載戶口田地首詳原額次詳現在丁糧管收除在昭然可考而今昔懸殊多寡異數者由

南陽遭明季流氛幾無孑遺也我

朝休養生息以來輕徭薄賦招流勸墾民日殷富而整
驛遞銷鹽引惟在良有司斟酌而循之爾

一官師志南陽爲中州重地舊多藩臣封國博稽史
傳叙其歷代爵里姓名備典故也職官選舉宋元
以前代各異制我

朝所設文武職官因明制而損益之惟選舉全仍明舊
故進士舉貢題名則自明始舊志如此今依次編
入恐日久湮沒不彰無以傳信故連類而並志之

示不忘也

一人物志自周秦以來或策勲廊廟或遯迹邱園或忠孝節義政事文學凡可爲後人取法者則志焉不爲區別也第古人里居歷代郡邑夏名及地址相連割此隸彼幾無定形邑乘不爲詳考叠出互見遂至混淆今按其山川道里詢其子孫廬墓所在合之傳記載然不移若流寓若僊釋若列女皆徵事覈實闕疑存信不容濫收

一藝文志所輯古今人詩文皆取其有關於南陽之

徵實者昔人行一善政創一義舉復一古蹟必爲
文爲詩以紀其事傳諸後世感人心勵風俗所繫
甚大近時篇目頗繁略爲刪定間有自著記事之
詞並載入志以備考證